

Napakainam ng sitwasyon para ibayong isulong ang demokratikong rebolusyong bayan

Komite Sentral
Partido Komunista ng Pilipinas

Buong-kagalakan nating ipagdiwang ang ika-57 anibersaryo ng dakilang Partido Komunista ng Pilipinas! Sa makasaysayang okasyong ito, ipinarrating ng Komite Sentral ang maalab nitong pagbati sa lahat ng kadre at kasapi ng Partido, sa mga kasapi ng mga kaalyadong rebolusyonaryong organisasyon sa National Democratic Front, sa mga kaibigan, sa mga kapanalig na komunista, pwersang rebolusyonaryo at anti-imperyalista sa iba't ibang dako ng mundo, at sa buong sambayanang Pilipino.

Sa araw na ito ay alalahanin at kilalanin natin ang lahat ng bayani at martir ng rebolusyong Pilipino. Tumindig tayo para taas-kamaong

magbigay-pugay sa alaala ni Kasamang Jose Maria Sison, tagapangulong tagapagtatag ng Komite Sentral ng Partido, na nagsilbing

gabay at liwanag sa Partido at ilang salinlahi ng mga komunista at rebolusyonaryong aktibista. Magbigay pugay din tayo sa alaala ng lahat ng bayani at martir ng sambayanang Pilipino, kabilang ang pinakamamahal na mga lider na nagsilbi sa Komite Sentral, mga Pulang mandirigma ng Bagong Hukbong Bayan, at lahat ng mga kadre at kasapi na buong-pusong inalay ang kanilang buong buhay para sa kapakanan ng



paglaya ng lahat ng inaapi.

Saluduhan natin sina Kasamang Luis Jalandoni, dating punong internasyunal na kinatawan ng NDFP at pinuno ng NDFP *panel* sa usapang pangkapayapaan, na pumanaw noong Hunyo sa The Netherlands; at si Kasamang Maria Malaya (Myrna Sularte), na pinatay ng kaaway sa isang labanan sa kabundukan ng Butuan City noong Pebrero. Ipaabot din natin ang pagsaludo kay Kasamang Basavaraju, dating pangkalahatang kalihim ng Komite Sentral ng Communist Party of India (Maoist) at si Kasamang Madvi Hidma, kumander ng People's Liberation Guerrilla Army sa India, at sa lahat ng iba pang rebolusyonaryo sa iba't ibang dako ng mundo na nag-alay ng kanilang buhay para sa internasyunal na proletaryado. Humalaw tayo ng inspirasyon sa kanilang maniningning na buhay.

Batiin din natin sa araw na ito ang lahat ng bagong kasapi ng Partido, laluna ang mga kabataang kadre mula sa hanay ng masang anakapawis, mga intelektwal at iba pang saray ng lipunan. Kayo ang kinabukasan ng Partido at ng rebolusyong Pilipino. Mataman kayong mag-aral, kumuha ng gabay, pata-lasin ang isip at maging mapagkumbaba sa pagharap sa mga hamon sa pamumuno sa iba't ibang larangan ng rebolusyonaryong gawain ng Partido. Katuwang ninyo sa pagbalikat ng mabibigat na tungkulin ang mga nakatatanda at may karanasang mga kadre at kasapi ng Partido na handang magpayo at magba-

hagi ng kanilang karanasan.

Itanghal natin sa araw na ito ang Marxismo-Leninismo-Maoismo, ang matibay na teoretikal na pundasyon kung saan nakatindig ang Partido. Ito ang unibersal na teorya para sa pagpapalaya ng uring manggagawa at lahat ng aping uri. Pagtibayin natin ang mga saligang prinsipyo ng Partido at ang programa nito para sa demokratikong rebolusyong bayan sa pamamagitan ng matagalang digmang bayan, para wakasan ang mapang-aping sistemang malakolonyal at malapyudal, ibagsak ang tatlong saligang suliranin na imperyalismo, pyudalismo at burukrata-kapitalismo, at kamtin ang demokrasya at pambansang paglaya para likhain ang kundisyon para sa sosyalistang hinaharap.

Pumapasok tayo ngayon sa ikatlong taon ng ating kilusang pagwawasto, na sa pangunahi'y isang Marxista-Leninista-Maoistang kilusang pag-aaral. Sa diwa ng kilusang pagwawasto, nagbalik-aral tayo sa ating karanasan at kritikal-sa-sariling tinukoy ang ating mga kahinaan at mga naging pagkakamali. Ikinalulugod ng Komite Sentral na iulat na patuloy na nagbubunga ang ating kilusang pagwawasto at nagkamit ng makatuturang mga pagsulong sa ideolohiya, pulitika at organisasyon. Nagtitiwala tayo na sa patuloy na pagpupunyagi ng lahat ng kadre at kasapi ng Partido, sa pamumuno ng Komite Sentral, makakamit natin ang higit na malalaking tagumpay sa mga taong darating.

Sa tanglaw ng Marxismo-Leninismo-Maoismo, matalas nating suriin ang pangunahing mga kontradisyong bumubuo ng kasalukuyang kinakaharap na sitwasyon sa bansa at buong daigdig. Gagapin natin ang pamalagiang krisis ng malakolonyal at malapyudal na sistema sa Pilipinas, at ang nagtatagal nang istagnasyon ng pandaigdigang sistemang kapitalista. Nagbubukas ito ng ma-

rami at malalaking oportunidad para isulong ang adhikain ng uring manggagawa at lahat ng api at pinagsasamantahalang uri para sa paglaya.

Sa simula ng kasalukuyang taon ay inasahan natin ang pagsiklab ng krisis ng naghaharing sistema sa ilalim ng rehimeng US-Marcos. Subalit sadyang nahigitan ito ng bilis ng paghinog at pagputok ng sitwasyon simula kalagitnaan ng taon. Tanda ito, hindi lamang ng lalim ng krisis pang-ekonomya at panlipunan, kundi lalo't higit, ng nag-uupaw na galit ng sambayanang Pilipino sa pang-aapi at pagpapahirap sa kanila ng mga mapagsamantala at mandarambong na naghaharing uri.

Tiyak na magpapatuloy pa sa hinaharap ang walang kalutasang krisis sa harap ng walang sukat na korapsyon, paghahasik ng pasistang terorismo at sagadsaring pagpapakapet ng rehimeng Marcos. Ang rehimeng US-Marcos ngayon ang pinakakonsentradong anyo ng pang-aapi at pagpapahirap sa sambayanang Pilipino. Sa taong darating, tiyak na lalaki at lalawak pa ang kilusang protesta na dumaluyong sa nagdaang mga buwan para panagutin at patalsikin sa poder sina Marcos at Duterte na siyang kumakatawan ngayon sa pinakareaksyunaryong pangkatin ng mga naghaharing uri. Kasabay nito, tiyak na sisiklab din ang malawakang mga paglaban sa kanayunan sa harap ng walang habas na pang-aagaw ng lupa at pandarambong sa yaman ng bansa.

Sadyang napakainam ng sitwasyon ngayon sa Pilipinas para pamunuan ng Partido ang ibayong pagsulong ng demokratikong rebolusyong bayan sa pamamagitan ng matagalang digmang bayan. Sungaban natin ang pagkakataon para ibayong palawakin at palakasin ang Partido at ang buong rebolusyonaryong kilusan, at tanawin ang malalaking pagsulong sa hinaharap.



Espesyal na Isyu | Disyembre 26, 2025

 ang.bayan@cpp.ph

Ang Ang Bayan ay inilalathala dalawang beses bawat buwan ng Komite Sentral ng Partido Komunista ng Pilipinas

I. Tumitinding mga sigalot sa harap ng hindi malutas na krisis ng pandaigdigang sistemang kapitalista

Inuuga ang buong mundo ng apat na pangunahing kontradiksyon: sa pagitan ng monopolyong burgesya at uring manggagawa, sa pagitan ng imperyalismo at aping mamamayan sa buong daigdig, sa pagitan ng mga imperyalistang kapangyarihan at mga bansang naninindigan para sa pambansang kasarinlan, at sa pagitan ng mga nagriribalang mga imperyalistang bansa. Sa kasalukuyan, ang tumitinding mga sigalot sa pulitika, pinansya, ekonomya, kalakalan, at militar sa pagitan ng pinakamalaking imperyalistang bansa ang prinsipal na kontradiksyon, laluna sa harap ng walang awat na pagpapataw ng imperyalistang US ng kanyang hegemonya sa buong mundo. Ito ang prinsipal na kontradiksyon na naghuhugis ng kasalukuyang sitwasyon sa buong daigdig.

Sumisiklab sa iba’t ibang panig ng mundo ang mga armadong sigalot, pangunahin bunsod ng pang-uupat ng imperyalismong US. Mahigpit itong nakaugnay sa nagtagal nang istagnasyon ng ekonomya ng pangunahing mga kapitalistang bansa na hindi malutas-lutas ng monopolyong burgesya. Resulta ito ng nagpapatuloy na krisis ng sobrang produksyon sa halos lahat ng industriya, at lumalaking imbentaryo ng hindi mabentang mga kalakal. Sobra-sobra ang produktibong kapasidad, higit lalo ng mga pangunahing bansang industriyalisado. Bunsod ito ng paghahabol ng magkakabilal na kumpanya na daigin ang isa’t isa sa produksyon ng pinakamaraming kalakal.

May labis na produksyon sa halos lahat ng industriya dahil sa patuloy na pagpapaunlad ng mga pwersa sa produksyon, partikular na ang mga pag-abante sa teknolohiya (kabilang ang paggamit ng *artificial intelligence* o AI). May sobra-sobra kapasidad sa produksyon ng mga kagamitang elektroniko, semikonduktor, mga baterya, sasakyang elektrik at de-gasolina, mga *solar panel*, asero (bakal), langis at petrolyo, kemikal, barko, transportasyong komersyal, eroplano, at maraming iba pa. May sobra-sobrang produksyon din sa halos lahat ng produktong pang-agrikultura (bigas, mais, soya, trigo at iba pa), laluna sa mga kapitalistang bansa.

Winawasak o winawaldas ang

mga pwersa sa produksyon. Dahil sa sobrang produksyon, maraming mga industriya ang pinatatakbo na mas mababa kaysa kapasidad sa produksyon. Sa US, halimbawa, 60%–70% lamang ng kapasidad nito sa produksyon ng mga sasakyan ang nagagamit. Sa Germany, nasa 70% lamang ng kapasidad sa kabuuang produksyon ang nagagamit, dahilan na hindi nagagamit ang bilyun-bilyong dolyar na mga kagamitan sa produksyon. Sa China, may kapasidad ang mga pabrika dito na magprodyus ng hanggang 45 milyong sasakyang elektrik (*e-vehicle*), subalit hindi ito lubos na nagagamit dahil ang bentahan sa pandaigdigang pamilihan ay nasa 16–18 milyon lamang. Paparami ang mga kumpanyang nalulugi o nilalamon sa harap ng matinding kapitalistang kumpetisyon.

Mabilis ngayong lumalaki ang bula ng AI na kinahihibangan ng malalaking monopolyong burgesya. Ilang trilyong dolyar ang ibubuhos sa larangan ng AI sa mga susunod na taon, sa wala pang kapantay na laki ng pamumuhunan sa imprastruktura at bono, lagpas-lagpas sa inaasahang *demand* at kikitain nito. Inihahambing ito ngayon sa bula ng “dotcom” noong dekada 1990 na malao’y pumutok at nagresulta sa isang krisis sa pinansya.

Lalong sumisidhi ang problema ng maramihang pagsisisante ng mga manggagawa, pagbawas sa araw ng trabaho o pagsasara ng mga pabri-

ka. Sa US, halos 560,000 kumpanya ang nabangkarote sa isang taon mula Setyembre 2024, mahigit 10% pagdami kumpara sa taon, pinakamatarik mula 2010; kabilang ang 32 na may sobra sa \$1 bilyong ang halaga, na nagsara sa 12 buwan mula Setyembre 2024. Sa nagdaang sampung taon, hindi bababa sa 100,000 kapitalistang sakahan sa US ang tumiklop dahil sa patuloy na pagbasak ng presyo ng kanilang kalakal. Sa Germany, inaasahang aabot sa kabuuang 22,000 ang magsasarang kumpanya sa buong taon (60 kada araw), pinakamataas sa isang dekada. Sa UK, mahigit 2,000 kumpanya ang nagsasara buwan-buwan ngayong taon, habang nasa 50,000 empresa ang nasa kritikal na sitwasyon. Sa China, inaasahang 15 kumpanya na lamang (mula 129 kumpanya) ang matitirang nakatayo sa industriya ng *e-vehicle* sa susunod na limang taon.

Patuloy na lumalala ang disempleyo sa buong daigdig. Sa sektor ng teknolohiya, tinatayang aabot sa mahigit 200,000 ang masisisanteng manggagawa hanggang sa katapusan ng taon (70% nito sa US), kabilang ang 24,000 sa Intel, 14,000 sa Amazon, 13,000 sa Verizon at 9,000 sa Microsoft. Sa industriya ng sasakyan sa US, aabot sa 15,000 (20% mas mataas kumpara sa taong nakalipas) ang inianunsyong masisisante ngayong taon. Tinatayang hanggang 60,000 manggagawa sa sektor ng sasakyang elektrik sa China ang tinanggal sa trabaho mula 2024. Mahigit 48,000 empleyado naman ng United Parcel Service ang sinipa sa trabaho dahil sa pagbagsak ng mga deliberi.

Nakasadlak sa istagnasyon hanggang makupad na paglago ang pandaigdigang ekonomya. Humaharap sa lumalaking banta ng resesyon ang mga ekonomya ng lahat ng sentro ng kapitalismo. Ang tunguhin ito ng mabagal na paglago ng mga

ekonomya ay magdadalawang dekada na, simula nang sumambulat ang krisis pampinansya noong 2008. Rumbanse ang pandaigdigang ekonomya noong 2022 matapos bumulusok noong pandemyang 2020–2021. Ngayong taon, may mga pagtaya, kabilang ang sa World Bank at IMF, na hindi lalago ang pandaigdigang ekonomya lagpas sa 2.3%, mas mababa kumpara sa mababa ding 2.5% paglago noong 2024, sa harap ng malawakang pagsasara ng mga empresa, pagsisisante sa mga manggagawa at mababang *demand* dahil sa mataas na tantos ng implasyon, laluna sa mga kalakal na pangkonsumo.

Nananatiling nasa bingit ng resesyon ang ekonomya ng US na tinatayang lalago lamang ng 1.7%–2% ngayong taon. Halos kalahati (o 22) ng mga estado sa US ang nasa resesyon na. Sa ilalim ng patakarang “America First” ng gubyernong Trump, ipinatupad ang mga desperadong hakbang na diumano’y para buhaying muli ang ekonomya at industriya. Kabilang dito ang pagtaas ng taripa sa halos lahat ng inaangkat na kalakal ng US na may deklaradong layunin na proteksyunan at suportahan ang lokal na industriya at manupaktura. Gayunman, sa nagdaang 11 buwan, nanatiling tigil o humina pa ang produksyong industriyal, kabilang ang bakal at mga sasakyan, sa harap ng sobrang pandaigdigang produksyon at labis na imbentaryo.

Inaasahan namang lalago lamang nang 1.3% ang ekonomya ng mga bansa sa European Union, kabilang ang lugmok na ekonomya ng Germany na inaasahang aabot lamang sa 0.2% (mula -0.3% noong 2024). Nasa bingit naman ng resesyon ang United Kingdom mula pa nakaraang taon. Bumagsak sa -2.3% ang Japan noong ikatlong kwarto ng taon, at hindi inaasahang lalago lagpas sa 1% sa buong taon. Patuloy namang bumabagal ang paglaki ng ekonomya ng China na inaasahang aabot lamang sa 5% (mula mahigit 10% paglawak noong

2000–2010), sa harap ng pagkalugi ng mga natenggang proyektong *real estate* (kabilang ang sobra-sobrang mga kondominyum at gusaling pang-upisina), naipong gabundok na hindi mabayaranang lokal na utang at pagbagsak ng pamumuhunan sa manupaktura at imprastruktura.

Sa kabuuan, tinatayang may 40–60 bansa ang nasa bingit ngayon ng resesyon. Liban sa mga pangunahing sentro ng kapitalismo, kabilang rin dito ang ilang abanteng ekonomya sa Europe tulad ng Austria, Germany, Italy, France at Switzerland na pawang negatibo o sero ang tantos ng paglago ng ekonomya, dagdag pa sa ilampung mga bansang atrasado.

Ang masidhing krisis ng sistemang kapitalista ay lalong nagpapalala sa pagkawasak ng kapaligiran at krisis sa klima. Tahasang tumatangi ang malalaking kapitalistang bansa na magpapigil sa pagkamkam ng likas na yaman at mga hilaw na materyales, na dahilan ng papalalang polusyong industriyal at pagtaas ng temperatura sa buong mundo. Walang saysay ang taunang pakitang-taong “climate change conference” na pinasimunuan ng UN, kabilang ang idinaos kamakailan sa Brazil.

Sa gitna ng krisis ng pandaigdigang sistemang kapitalista, lalong nalulugmok ang hindi industriyalisado, agraryo at atrasadong ekonomya ng mga bansang kolonyal, malakolonyal at malapyudal. Ang mga bansang ito ay nilumpo ng ilang dekadang mga patakarang neoliberal na nagbukas sa mga ito sa pagtatambak ng dayuhang sobrang kalakal at pandarambong ng dayuhang kapitalistang pamumuhunan. Dahil sa hindi pantay na palitan, dumaranas ang mga ito ng pamalagiang depisito sa kalakalan, krisis sa pinansya at pagsalalay sa utang. Habang umiigting ang kumpetisyon ng mga monopolyong burgesya para sa pagkukunan ng pinakamurang mga hilaw na materyales, lalong pinag-aagawan ang mga bansang ito ng mga imperyalistang

kapangyarihan. Nagdurusa ang ilang bilyong mamamayan sa mga bansang ito sa harap ng malawakang disempleyo, mababang sahod, pang-aagaw ng lupa at kabuhayan, at iba pang anyo ng pagpapahirap at pang-aapi.

Patuloy na bumabaling sa pangungutang ang mga bansa sa tangkang tawirin ang krisis sa kaniilang mga ekonomya, tustusan ang mga subsidyo ng estado para sa mga naluluging kumpanya, pondoan ang mga imprastruktura at papalaking gastos sa depensa. Sa loob lamang ng unang anim na buwan ng 2025, sumirit nang \$21 trilyon ang pandaigdigang utang at sa halos \$340 trilyon sa kalagitnaan ng taon. Kinakatawan ng kabuuang pandaigdigang utang ang halos 290% ng kabuuang pandaigdigang produksyon, na halos kapantay ng pinakamataas na inabot noong 2023. Mayorya ng pandaigdigang utang ay hawak ng US, Japan, China at ilang mayor na bansa sa Europe. Sangkatlo nito ay utang ng US. Ang pampublikong utang ay inaasahang lumaki mula \$102 trilyon noong katapusan ng 2024 tungong \$115 trilyon sa katapusan ng taon. Umabot sa \$31 trilyon ang pampublikong utang ng mga atrasadong bansa, dobleng paglaki sa nagdaang 15 taon. Hindi bababa sa 35 bansa ang nanganganib na hindi makapagbayad ng kaniilang mga utang.

Ginagatungan ng sumisidhing pandaigdigang krisis ng kapitalismo ang maigting na tunggalian ng mga imperyalista at mga sigalot sa mundo. Ipinataw ni Trump ang dagdag na mga taripa sa halos lahat ng bansa para makakuha ng mga konsesyon sa kalakalan (kabilang ang pagpapasok ng mas maraming produkto mula sa US, at pakontrata sa pagbenta ng mga sarplas na kagamitang militar). Sa ginawa niyang ito, lalo niyang pinatindi ang kumpetisyon sa ekonomya at kalakalan ng mga imperyalista at pinalalim ang mga sentimiyentong anti-US sa buong mundo.

Palaki nang palaki ang banta ng

pagsiklab ng mga mayor na armadong sigalot sa iba't ibang panig ng mundo, kasabay ng papalaking pondong ibinubuhos ng mga imperyalista sa militar at depensa. Sumirit ito nang 9.4% noong 2024 tungong \$2.72 trilyon, pinakamatarik na pagsirit sa nagdaang mahigit tatlong dekada. Patuloy ang pagsirit na ito ngayong 2025. Aabot sa \$1 trilyon ang gastos militar ng US ngayong taon. Sa balangkas ng bagong National Security Strategy (2025) ng US (na nakatuon pangunahin sa China at Russia), idineklara nito ang layunin na paunlarin ang “pinakamakapangyarihan, pinakamatindi, at pinakaabante sa teknolohiya” na pwersang militar.

Idinidiin ng US na dapat nitong higitan ng mas malaking pwersa ang China sa karagatan at “first island chain” sa palibot ng bansa. Layunin nito diumano ang “iwasan ang kumprontasyon,” subalit lalo lamang nitong pinalalaki ang posibilidad na masindihan ang armadong sigalot at gera. Sa sariling bahagi ng mundo, ikinakasa ngayon ng US ang planong lusubin ang Venezuela (sa South America) sa tabing ng “paglaban sa *drug cartel*” para pabagsakin ang anti-imperyalistang gubyerno ni Maduro, at itayo ang isang papet na gubyerno. Matapos ang nagtatagal na gera sa Ukraine na sinulsulan ng US at NATO, itinutalak ngayon ng US ang isang kasunduan para paghatian ang rekurso at lupain ng bansa. Sa Middle East, tuluy-tuloy na katuwang ng US ang Zionistang estado ng Israel sa gerang henosidyo laban sa Palestine na pumatay sa hindi bababa sa 67,000 Palestino sa dalawang taong pambobomba sa Gaza mula Oktubre 2023. Sa kabila ng “tigil-putukan” na pinamagitan ng US noong Oktubre, patuloy ang mga pag-atake ng mga pwersang Zionista na nagresulta sa pagpatay sa hindi bababa sa 400 nang Palestino. Ikinakasa ng US ang plano nitong kontrolin ang ilang bahagi ng Gaza Strip, kahit pa taliwas ito sa plano ng Israel na kamkamin ang buong lupain. Pinag-

tulungan ng US at Israel na bombahin ang Iran, na nagtanggol ng bansa sa pamamagitan ng mga kontra-atake.

Patuloy ang pagpapalakas ng “komprehensibong estratehikong tulungan” ng Russia at China sa anyo ng pinalakas na kalakalan (laluna sa langis at enerhiya) at kooperasyong militar. Patuloy na pinalawak ang alyansang BRICS (Brazil, Russia, India, China at South Africa) na ngayon ay may sampu nang myembrong bansa matapos ang pagsapi ngayong taon ng Indonesia (kasunod ang Egypt, Ethiopia, Iran, United Arab Emirates).

Sa tulak nito, at bilang ganting tugon sa mga taripa ni Trump, patuloy ang pagsisikap ng maraming bansa na lumayo sa paggamit ng dolyar sa mga transaksyong pampinansya, kahit pa nananatili itong dominante. Kabilang dito ang bentahan ng langis ng Saudi Arabia at iba pang bansa sa Middle East (laluna sa China), kalakalang yuanruble ng China at Russia, at kalakan gamit ang lokal na salapi sa ASEAN. Mula sa halos wala bago 2022, aabot na ngayon sa 20% ng kabuuang kalakalan sa mundo ang hindi gumagamit ng dolyar, dahilan ng tunguhin ng pagbaba ng halaga nito, at lumalakas na bentahan ng ginto. Nagsimula noong 2022–2024 ang lagpas sa 1,000 toneladang bentahan, mula sa karaniwang taunang bentahan na 450–500 tonelada noong 2010–2021.

Ang nagpapatuloy na krisis sa mga kapitalistang bansa ay nagbubunsod ng umiigting na tunggalian ng mga uri. Patuloy na umiigting ang mga pakikibakang manggagawa sa mga sentrong kapitalista, kabilang ang welga ng mga manggagawa ng Amazon sa US at iba't ibang bansa. Sumiklab din nitong kalagitnaan ng taon ang malawakang mga welga ng mga manggagawa sa China para sa umento sa sahod, partikular sa kumpanyang BYD (gumagawa ng sasakyang elektrik). Sumiklab naman ang malawak na mga welga at kilos protesta ng mga

manggagawa sa mga pantalan sa Japan noong Marso hanggang Mayo. Sa Europe, sumiklab ngayong Disyembre ang mga pangkalahatan o sabayang welga ng mga manggagawa at mamamayan sa Belgium, The Netherlands, Portugal, Italy at France, laban sa mga patakarang *austerity* o paghihigpit ng sinturon, na pangunahing tatama sa pensyon, sahod at mga serbisyong panlipunan. Sumiklab din ang mga mayor na welga sa mga nagdaang buwan sa Germany, Spain, United Kingdom at iba pang bansa.

Reaksyon sa lumalakas na paglaban ng mga manggagawa at mamamayan ang kapuna-punang pagbaling ng mga estado sa garapalang pasistang mga patakaran. Sa US, sumasahol nang sumasahol ang awtoritarianismo ni Donald Trump sa tahasang paglapastangan sa mga batas at ligal na proseso sa isinasagawang marahas na *crackdown* laban sa mga imigrante sa US, na bumubuo ng malaking bulto ng uring manggagawa. Sa sulsol ng monopol-yong burgesy, lumalakas ang mga partido at kilusang pasista at konserbatibo, at may mga nahahalal sa gubyerno. Patuloy na lumalala ang mga atake laban sa mga Muslim at Arabo (pinakamalala sa US sa nagdaang tatlong dekada, kaakibat ang pagsupil ng gubyernong Trump sa mga protestang maka-Palestine), mga Black at Latino sa US, mga LGBT, at mga migrante sa Europe. Bahagi ng lumalakas na tunguhing pasista, ipinatutupad ang mga batas at patakaran na malawakang sumusupil sa mga karapatang sibil, katulad ng pagpapalakas ng *mass surveillance*, paggamit ng mga drone, AI at iba pang teknolohiya na lumalabag sa mga karapatan sa pribasiya. Matapos ang mahigit tatlong taon, walang habas pa rin ang gerang henosidyo ng Zionistang Israel sa Gaza. Sa tulak pangunahin ng US, pinahihina ang United Nations sa pamamagitan ng pagkakait dito ng pondo, laluna sa mga ahen-sya nito para sa karapatang-tao.

Ang papalakas na pasisasyon o

tunguhing pasista ng mga estado sa US at iba pang bansa ay nagtutulak sa mga mamamayan na palakasin ang mga pakikibakang anti-pasista sa iba't ibang panig ng mundo. Idinaos ang mayor na mga rali at protestang anti-pasista, kabilang ang 7-milyong kataong rali sa mahigit 2,700 pagtitipon sa US laban sa pag-aastang hari ni Trump. Sa Europe, idinaos ang malalaking raling anti-pasista sa Netherlands, France, Germany, UK, Norway, at iba pang mga bansa. Nagpapatuloy ang malawakang mga demonstrasyon ng milyun-milyong mamamayan sa iba't ibang panig ng mundo laban sa nagpapatuloy na henosidyo ng US at Zionistang estado sa Gaza.

Sumisiklab din ang mga pakikibakang masa sa mga bansang atrasado, sa harap ng nagtataasang presyo ng mga bilihin, mababang sahod, pagbagsak ng pamantayan ng buhay, pang-aagaw ng lupa at kabuhayan, korapsyon at marangyang pamumuhay ng mga upisyal na gubyerno, pabigat na mga buwis, paglulustay ng pera ng gubyerno sa mga pasiklab na proyekto, pagkabulok ng mga serbisyong panlipunan, at matinding hindi pagkakapantay-pantay; at mga protesta laban sa korapsyon sa Kenya, Nepal, Indone-

sia, Morocco, Madagascar, Peru, Pilipinas at iba pang mga bansa. Marami sa mga ito ay tinaguriang mga “protestang Gen-Z” dahil sa malawak na ispontanyong pakilos ng mga kabataang nagdurusa sa gitna ng malalim na krisis sosyo-ekonomiko. May ilan sa kanilang ginamit ng mga reaksyunaryo o repormistang partido, pero marami din ang kalau-na’y nakonsolida bilang mga progresibo at rebolusyonaryo.

Napakainam ng kundisyon sa mundo para magpalakas ang mga proletaryong rebolusyonaryo sa iba't ibang dako ng mundo, at itayo ang mga partido komunista, upang magsilbing tanglaw sa masang manggagawa at iba pang api at pinagsasamantalang uri. Sa iba't ibang bayan, nagpapalakas ang mga proletaryong rebolusyonaryong grupo at partido sa ideolohiya, sa pagbabalik-aral at pagpapalalim ng gagap sa Marxismo-Leninismo-Maoismo, at paglalapat nito sa kinakaharap nilang kongkretong kalagayan. Salamin ng pagsisikap na ito ang naidaos na lima nang kumperensyang teoretikal ng NDFP mula lamang Oktubre 2023, na dinaluhan ng maraming partido komunista at iba pang organisasyong rebolusyonaryo para talakayin ang iba't ibang mahahalagang usaping kinakaharap

ng proletaryo sa buong mundo.

Sa mga bansang nakatayo ang mga partido komunista, nasa ubod at unahan ang proletaryo sa iba't ibang anyo ng mga demokratikong pakikibakang masa, pagbubuo ng malapad na nagkakaisang prente para sa pagtatanggol sa interes at kapakanan ng malawak na masa laban sa mga imperyalistang patakarang neoliberal, programang pahirap, korapsyon at pasismo ng reaksyunaryong estado. Sa India, Turkey, Peru, Colombia, Pilipinas at iba pang bansa, patuloy na nagpupun-yagi ang mga partido komunista sa paglaban sa teroristang todo-gerang panunupil, at pamumuno sa rebolusyonaryong armadong pakikibaka.

Hinog na hinog ang sitwasyon para sa pag-usbong at paglago ng mga partido komunista at para sa pagpapaigting ng mga rebolusyonaryong pakikibaka sa buong mundo. Ang kundisyon ng krisis ng nilikha ng kapitalistang sistema ay matabang lupa para sa paglaganap ng mga rebolusyonaryong ideya at malawakang pagkilos ng masa. Sentral ang papel ng mga partido komunista sa pamumuno sa uring manggagawa at iba pang aping uri, sa pakikibaka para sa kalayaan, demokrasya at sosyalismo.

II. Lumalalang krisis sa ekonomya at pulitika sa ilalim ng rehimeng US-Marcos

Lalong nasasadlak sa krisis ang naghaharing sistemang malakolonyal at malapyudal sa ilalim ng paghahari ng rehimeng US-Marcos. Lalong sumangsang ang sistemang bulok sa kaibuturan, sa harap ng garapalang korapsyon ni Marcos at kapwa niya burukrata-kapitalistang magnanakaw, ng pagkamal ng dambuhalang yaman ng pinapaburang mga burges kumprador, ng tumitinding pandarambong ng mga dayuhang kapitalista sa yaman ng bansa, ng malawakang pang-aagaw sa lupa at kabuhayan ng masa, at ng sumisidhing pagdurusa at pang-aaping dinaranas ng sambayanang Pilipino. Sadyang mahigpit na hinihingi ng sitwasyon ang rebolusyonaryong pagbabago para iwaksi ang lumang daan at dalhin ang bansa sa landas ng kalayaan, demokrasya at kaunlaran.

Sa harap ng nagpapatuloy na krisis ng pandaigdigang sistemang kapitalista, hinihila sa mas malalim na krisis ang lokal na ekonomya ng Pilipinas. Patuloy na sinasagkaan ng

imperyalismong US at mga naghaharing uri ang pag-unlad ng mga pwersa sa produksyon, dahilan na nananatili itong agraryo, atrasado at hindi industriyalisado.

Wala pa ring kakayahan ang lokal na ekonomya na tugunan ang pangangailangan ng mamamayan at paunlarin ang bansa. Ang lokal na produksyon ay nakaasa sa pag-aangkat ng mga kalakal na pangkonsumo at pamproduksyon, at nakatuon sa pagluluwas ng mga hilaw o bahagya lamang na naprosesong mga materyales, at mga kalakal na inasembol mula sa inangat na mga piyesa. Ang ekonomya ng bansa ay patuloy na nakaasa sa dayuhang kapital at pangungutang, kahit pa itinutulak ng World Bank na palakihin ang bahagi lokal ng pangungutang.

Dahil sa tagibang na kalakalan,

nananatiling malaki ang pamalagi-ang depisito o pagkalugi sa kalakalan, na umabot sa \$54 bilyon noong 2024 (mula \$52 bilyon noong 2023). Inaasahang mananatili ito sa ganon ding antas sa 2025. Bumulusok nang mahigit 83% ang sarplas sa *balance of payments* o balanse ng dayuhang transaksyon (kalakalan, kita at remitans mula sa ibayong dagat, pasok ng dayuhang pautang, ayuda o pamumuhunan) ng Pilipinas, mula \$3.7 bilyon noong 2023 tungong \$609 milyon noong 2024. , sa kabila ng wala pang kasinlaking \$38.34 na bilyong ipinasok na remitans ng mga migranteng manggagawang Pilipino.

Sumirit ang pangungutang ng gubyernong Marcos tungong ₱17.5 trilyon noong Oktubre 2025 (kabilang ang ₱5.5 trilyon o \$93 bilyong dayuhang utang), 40% paglaki mula maupo si Marcos noong 2022, para itawid ang depisito sa kalakalan, punuan ang *balance of payments*, at pondohan ang malalaki ngunit di produktibong mga proyektong pang-imprastruktura.

Patuloy na tumutumal ang lokal na manupaktura dahil sa pagliit ng order o paghina ng bentahan sa pandaigdigang pamilihan. Kabilang dito ang halos 5% pagbaba ng eksport ng mga produktong elektronikong tulad ng mga semikonduktor sa unang bahagi ng taon, na bumubuo ng malaking bahagi ng dayuhang pamumuhunan sa Pilipinas at 55%-60% ng inieeksport ng bansa.

Nananatiling mababa ang produksyon sa agrikultura, kahit pa mayroong kaunting pagbawi ngayong 2025 kumpara sa 2.2% pagkitid noong nakaraang taon. Pangu-nahing dahilan nito ang pananatiling atrasado ng mga kagamitan, maliitang antas ng produksyon, at bulnerabilidad sa mga bagyo at pagbaha. Lalong sumahol ang lokal na produksyon sa agrikultura dahil sa liberalisasyon sa importasyon ng bigas (na umabot sa wala pang kapantay na 4.8 milyong tonelada noong 2024) at iba pang mga produkto na nagresulta sa pagkalugi ng

mga magsasaka at paghina ng produksyon. Katulad na sitwasyon ang dinaranas sa sektor ng pangisda, manukan at babuyan.

Markado ang paglaki ng bilang ng mga nawalan ng trabaho. Mula Abril 2024 hanggang Abril 2025, tinatayang aabot sa 500,000 trabaho sa manupaktura ang nawala, kabilang ang 76,000 trabaho sa sektor ng semikonduktor at elektroniks. Ngayong taon, naglaho ang mahigit 300,000 trabaho. Daan-daanlibo ring mga drayber ng dyip, mama-malakaya, manininda sa palengke at iba pang maliliit na naghahanapbuhay ang inaagawan ng pagkakakitaan sa ilalim ng mga programang pinakikinabangan ng mga kapitalistang dayuhan at lokal.

Sa kanayunan, milyun-milyon ang nawalan ng trabaho sa nagdaang mga taon dahil sa pang-aagaw ng lupa, pagpapalayas, pagpapalitgamit ng libu-libong ektaryang lupa tungo sa *real estate*, mga minahan, plantasyon, mga proyektong “renewable energy” at iba pa. Napipilitan silang maging manggagawang-bukid, maghanap ng iba’t ibang pagkakakitaan sa agraryo o natural na ekonomya, o mamasukan sa mga sentrong bayan. Dagdag na pahirap sa masang magsasaka ang mga patakaran ng pasistang panggigipit, laluna ang pagtatakda ng limitadong oras sa pagtatrabaho sa bukid na ipinapataw ng mga nag-ooperasyong sundalo ng AFP.

Pilit pinagtatakpan ng gubyernong Marcos ang masidhing problema ng kawalan ng trabaho. Para palabasing mababa lamang ang tantos ng disempleyo (humigit-kumulang 95%), hindi binibilang sa “pwera ng paggawa” ang 10-15 milyong kababaihang walang trabaho (na mayorya ay nasa kanayunan) at gumaganap ng hindi bayad na trabaho sa mga tahanan, liban pa sa ilang milyong ikinategoryang “dismayadong manggagawa” na hindi na naghahanap ng trabaho. Sa kabilang panig, binibilang na “may trabaho” maging ang mga “self-employed” at mga “unpaid family

workers” (na kung tutuusin, ay mga walang mahanap na trabaho) na sa kabuuang ay bumubuo ng 13-16 milyon o hanggang 34% ng sinasabing may trabaho.

Kung isasama ang milyun-milyong kababaihang tinanggal sa “pwera ng paggawa” na ikinategoryang “maybahay” at aalisin sa bilang ng “may trabaho” ang sa aktwal ay wala namang hanapbuhay, ang tunay na tantos ng disempleyo sa Pilipinas ay hindi bababa sa 52% o mahigit kalahati ng pwera ng paggawa sa bansa. Hindi pa kasama dito ang malaking bilang ng “kulang ang trabaho” o underemployed, na sa malaking panahon ay wala ding trabaho, kung tutuusin, kabilang ang mas malaki na nasa kanayunan.

Sa harap ng napakasidhing problema sa disempleyo, umabot sa 2.47 milyong Pilipino ang nangibang-bayan para magtrabaho noong 2024, pinakamataas sa nagdaang limang dekada, at inaasahang singdami ang bilang ng daragdag sa mga migranteng manggagawang Pilipino. Humigit-kumulang naman 10 milyon ang mga “gig worker” na katumbas ng 22% ng kabuuang may trabaho. Kasama dito ang halos 200,000 mga “platform worker.” Nabibilang sa mga ito ang halos 90,000 mga *delivery rider*, na araw-araw nag-uunahan sa limitadong mga order o pasahero, at nagdurusa sa katakut-takot na trapik, habang kinakaltasan ang maliit nilang kita ng mga kapitalistang mayari ng mga “app.”

Pabulusok nang pabulusok ang antas ng buhay ng mayorya ng sam-bayanan, sa harap ng tuluy-tuloy na pagtaas ng presyo ng mga bilihin, laluna ng langis at pagkain. Nananatiling mataas ang presyo ng bigas na nasa ₱40-₱50 kada kilo. Pataas nang pataas ang gastos sa edukasyon, transportasyon, kalusugan, upa sa bahay, tubig, kuryente at iba pang serbisyo, na malaking bahagi ay negosyo ng malalaking kapitalista.

Tinatayang nasa ₱1,225 kada

araw na ang nakabubuhay na sahod para mabuhay nang disente ang lima-kataong pamilya. Humigit-kumulang kalahati lamang nito ang arawang minimum na sahod na ₱695 (mula Hulyo) sa National Capital Region, at lalong malayo ang mas mababang minimum na sahod sa iba't ibang rehiyon. Sadlak sa kahirapan ang masang mga manggagawang kumikita lamang ng minimum na sahod. Nagtitiis sila sa masisikip na barungbarong sa mga syudad, at humaharap sa banta ng pagpapalayas sa kanilang mga tirahan. Milyun-milyong walang hanapbuhay ang pumipila at handang tumanggap ng barya sa mga trabahong kontraktwal o pana-panahon.

Nasa kanayunan ang masang magsasaka. Sila ang bumubuo ng mayorya ng mga produktibong uri ng bansa, subalit ang dami nila ay itinatago sa mga upisyal na estadistika ng reaksyunaryong gubyerno. Para bigyang-matwid ang pagpapabaya sa kanayunan at palabasing hindi na agraryo ang ekonomya, hindi binibilang sa upisyal na estadistika ng reaksyunaryong estado ang malaking bahagi ng produktibong populasyon sa kanayunan kabilang ang mga magsasakang kababaihan at mga bata na kalahok sa produksyon.

Mayorya sa kanila ay walang sariling lupa o may maliit na parsela lamang na sinasaka, o nakikisaka lamang bilang kasamá o tenante, o nagtatrabaho bilang mga manggagawang-bukid. Dumaranas sila ng patindi nang patinding mga anyo ng pyudal at malapyudal na pagsasamantala at pang-aapi, partikular na sa anyo ng mataas na upa sa lupa at napakababang sahod. Kayod-kalabaw sila sa pagtatrabaho at pasan-pasan ang mataas na gastos sa produksyon, mataas na interes at pagkalubog sa utang, pambabarat sa kanilang mga produkto, at mataas na presyo ng bilihin. Lalong lumala ang kanilang kalagayan dahil sa liberalisasyon sa pag-aangkat na nagresulta sa pagbaha ng imported na bigas, sibuyas, bawang at iba

pang mga produktong pang-agrikultura, at pagbaha sa kanilang mga bukid dahil sa pagkakalbo sa mga kabundukan.

Daan-daan libo ang pinalalayas sa sariling lupa dahil sa malawakang pang-aagaw ng lupa ng mga panginoong maylupa, burgesyang kumprador at mga burukratang kapitalista, kinakasangkapan ang mga korte at iba't ibang ahensya ng reaksyunaryong gubyerno, at kadalasang gamit ang pwersa ng militar at pulis, para bigyang-daan ang pagpapalawak ng mga plantasyon, minahan, mga proyektong ekoturismo, *real estate*, “renewable energy” (tulad ng malalawak na *solar farms*) o proyekto para diumano sa “climate change mitigation” (tulad ng mga plantasyon ng kawayan).

Inaagawan din ng kabuhayan ang maliliit na mamamalakaya at magdaragat sa panghihimasok ng malalaking komersyal na *trawler* o barko sa 15-kilometrong *municipal waters*, taliwas sa itinakda ng reaksyunaryong batas na eksklusibong gamit ng maliliit na mangingisda. Pinagkakaitan din sila ng kabuhayan sa ginagawang reklamasyon ng lupa, at kapag nagsasagawa ang US at AFP ng ilang araw o linggong ehersisyong militar sa mga baybaying dagat. Humaharap din sila sa banta ng pagtatayo ng mga “coastal wind energy projects.” Pasan din nila ang bigat ng liberalisasyon sa importasyon ng isda, mataas na gastos sa pangangisda at interes sa pautang.

Dinaranas sa buong bansa ang matinding epekto ng pagbabago sa klima. Dahil ito sa pagkawasak ng bundok at ilog na ilang dekada nang dinadambong ng mga gahamang dayuhang kapitalista at kasabwat na lokal na naghaharing uri. Hindi masukat ang pagdurusa ng masang anakpawis kapwa sa kalunsuran at kanayunan sa harap ng malalalang pagbaha at pagguho ng lupa, na nagresulta sa pagkawasak ng mga tanim at pinagkukunan ng kabuhayan, pagkasira ng mga bahay at maramihang pagkasawi.

Upang mapanatili ang kanilang maalwan-alwang buhay, maghahapong kumakayod rin ang mga guro, mga ordinaryong kawani, maliliit na propesyunal, mga may-ari ng sasakyang pampasada, maliit na tindahan o pwesto sa palengke, mga may kasanayang *freelancer* o *gig worker*, mga *call-center agent*, at iba pang sektor na bumubuo ng uring petiburges. Sa gitna ng masidhing krisis panlipunan, ang mayorya sa kanila ay hindi na nakapag-iimpok para makapag-ari ng sariling bahay o makapagpalago ng kapital, at marami ay mabilis na dumadausdos sa katayuan sa buhay ng masang anakpawis. Milyun-milyong mga kabataan ang hindi na makapagtapos ng pag-aaral sa kolehiyo dahil sa taas ng singilin at mga gastusin.

Langit at lupa ang agwat ng buhay ng masa ng sambayanang Pilipino at ng ilang naghaharing uri. Habang dumadausdos o bumubumulusok ang buhay ng masang Pilipino, palaki nang palaki naman ang kinakamal na yaman ng malalaking burgesyang kumprador, panginoong maylupa at burukratang kapitalista. Mula nang maupo si Marcos, ang pinagsamang ari-arian ng tatlong pinakamayaman sa Pilipinas—sina Enrique Razon, Manuel Villar at Ramong Ang—ay lumaki nang 56% mula ₱485.6 bilyon tungong ₱1.3 trilyon, habang ang sa 50 pinakamayaman ay lumago nang 25% mula ₱979 bilyon tungong ₱4.9 trilyon, malayo sa ibinigay na 7.5% pagtaas sa sahod ng mga manggagawa sa National Capital Region ngayong taon.

Habang sadlak sa lusak ng kahirapan ang masang anakpawis, nabubuhay nang marangya at maluhog ang mga naghaharing uri. Nilulustay nila ang yaman sa kanilang mga mansyon, mamahaling sasakyan, pribadong resort at mga yate, gintong mga relo at alahas, pagkakasino at paroo't parito ng biyahe sa ibang bansa lulan ng kanilang sariling mga eroplano.

Kumakamkam sila ng dambuhalang yaman sa pakikisosyo sa mga dayuhang malalaking kapitalista at

bangko, bilang mga ahente sa pagluluwas ng mga hilaw na materyales (mga mineral, prutas, kopra, yamang-dagat, goma), pag-aangkat ng mga yaring kalakal at kagamitan, at bilang mga manedyer ng mga dayuhang namumuhunan sa mga kumpanyang nagsasamantala sa murang lakas-paggawa para sa asembleya para sa pag-eeksport. Sila ang nasa likod ng pang-aagaw ng lupa at pagsasapribado at pagnenegosyo sa mga serbisyong publiko tulad ng kuryente, tubig, telekomunikasyon at transportasyon. Hawak nila ang pinakamalalaking bangko, mga kumpanya at konglomereyt kabilang ang International Container Terminal Services (ICTS), SM Investments, BDO, SM Prime, Meralco, BPI, San Miguel Corporation, Ayala Land, PLDT, China Bank at iba pang malalaking korporasyon. Sila ang nagpondo at sumusuporta sa pinakamalalaking partidong pampulitika, at nakikinabang sa pabor ng guberno sa mga kontrata, batas, proyektong pang-imprastruktura at mga desisyon ng korte.

Katuwang ang naghaharing uri ng imperyalismong US sa pagpapatiling atrasado ng bansa. Wala silang interes na ipundar ang saligang mga industriya at paunlarin ang agrikultura, o itaguyod ang ekonomyang nakapagsasarili. Nagkakamal sila ng yaman mula sa pagkaatrasado ng bansa.

Ang naghaharing uri ay pangunahing kinakatawan ngayon ng sagdsaring papet na rehimeng Marcos. Pinamamahalaanan niya ang estadong neokolonyal, na ang pangunahing haligi ay ang Armed Forces of the Philippines (AFP) na kinokontrol ng imperyalismong US. Sa harap ng tumitinding ribalan sa China sa nagdaang dekada, ibayong pinahihigpit ng imperyalismong US ang kontrol sa Pilipinas. Tumindi ang panghihimasok ng militar ng US sa pamamagitan ng palaki nang palaking Balikatan *exercises*, na isinasagawa sa ilalim ng Mutual Defense Treaty, Visiting Forces Agreement, Enhanced Defense Cooperation Ag-

reement (EDCA) at iba pang tagibang na kasunduang militar ng US at Pilipinas.

Sa ilalim ni Marcos, palaki nang palaki ang presensya ng mga tropa, mga sasakyan at kagamitang pandigma ng US sa Pilipinas. Binuksan ng US ang dagdag na sikretong mga EDCA *site* para magsilbing himpilan ng mga tropa at tagapayong militar ng US, at lagakan ng mga misayl at iba pang sandata ng US. Karugtong ito ng papalaking presensyang militar ng US sa rehiyong Asia kasabwat ang mga papet na guberno sa Japan at South Korea. Suson-suson ang mga ehersisyong pandigma at pagmamaniobra ng mga pwersang militar ng US. Sinasamantala ng imperyalismong US ang hidwaan ng Pilipinas at China sa South China Sea para mag-udyok ng armadong sigalot. Ginagamit nito ang sagdsaring maka-US na grupong Akbayan bilang sibilyang tagasulsol ng gera, at tagapaypay ng Sinophobia o sentimyentong anti-China para ilarawan ang US na “kakampi” o “tagapagtanggol” ng soberanya ng Pilipinas.

Inilalarawan ng mga upisyal ng gubernong US na nasa “hyperdrive” o napakataas na antas ng “kooperasyon” ng US at Pilipinas, sa harap ng walang kasimpantay na panghihimasok militar nito sa bansa. Itinayo kamakailan ng US ang Task Force Philippines para lalong pahigpitin ang kontrol sa AFP, at mas epektibong gamitin ito sa mga operasyong militar ng US sa Pilipinas. Kasunod nito, pinagtibay ng Kongreso ng US ang Philippine Enhanced Resilience Act o PERA na maglalaan sa Pilipinas ng aabot sa \$500 milyong taunang Foreign Military Financing o kabuuang \$2.5 bilyon sa 2026–2030, mahigit sampung ulit ng karaniwang inilalaan ng ayudang militar sa bansa.

Sadlak sa krisis pampulitika ang neokolonyal na estado sa harap ng matinding sigalot ng magkakaribal na pangkatin ng naghaharing uri, at pagkahiwalay sa mamamayan ng pasista at bantog sa korapsyon na

rehimeng Marcos. Naging tampok sa nagdaang taon ang pagpayag ni Marcos sa paghuli at pakulong sa dating tiranikong presidente na si Rodrigo Duterte sa mga pasilidad ng International Criminal Court sa The Netherlands dahil sa mga kaso ng krimen laban sa sangkatauhan kaugnay ng maramihang mga pagpatay sa huwad na “war on drugs.” Naging maigting rin ang bangayan sa naunsyaming *impeachment* kay Sara Duterte na itinulak ng malawak na hanay ng mga pwersang progresibo, katuwang ang mga karibal ng mga Duterte sa kongreso. Subalit sa takot na siya ang isusunod, ipinatigil mismo ni Marcos ang paglilitis sa Senado, kasabwat ang mga kaalyado ni Duterte.

Naganap ang isa sa pinakabulok na reaksyunaryong eleksyon noong Mayo, kung saan naging garapalan ang pandaraya, pagbaha ng kinurakot na salapi upang ipambili ng boto, karahasan, at pampulitikang akomodasyon na inareglo ng mga opereytor ng US. Salamin ito ng bulok na naghaharing sistemang pampulitika. Sa kabilang panig, naging makatuturan ang paglahok ng mga progresibo at patriyotikong partido sa eleksyon, kahit pa pinuntirya sila ng panggigipit ng mga armadong pwersa ng estado. Katangi-tangi ang kanilang mga kandidato sa mahigpit na pagdadala ng mga hinaing ng masa, paglalantad sa bulok na eleksyon at pagtataguyod sa pambansa at demokratikong hangarin ng sambayanan.

Sa gitna ng masidhing krisis sa ekonomya at pagbulusok ng kabuhayan ng malawak na masa ng sambayanan, sumiklab ang malawak na galit sa korapsyon at pandarambong sa pondo ng bayan. Tumambad sa mga publikong imbestigasyon ang dambuhalang pondo ng bayan na kinulimbat ng mga burukratang kapitalista sa maaanomalya at palpak ng proyektong *flood-control*, at pagbalsa ng daan-daang bilyong pisong kikkak ng mga upisyal ng Department of Public Works and Highways (DPWH), mga kong-

resman, senador, at matataas na upisyal ng Malacañang.

Simula Setyembre, ilang buwan na dumaluyong ang kilusang protestang anti-korapsyon, sa pangunguna ng mga kabataang estudyante, ang karaniwang tinaguriang Generation Z o Gen-Z, katulad ng mga protesta sa ibang bansa. Subalit hindi katulad ng sandaling ningas ng protesta sa ibang bansa, nagtuluy-tuloy ang protesta ng mga kabataang estudyante sa Pilipinas, sa payong ng pambansa-demokratikong mga pwersa. Sumanib ito at humugot ng lakas sa pagkilos ng iba't ibang demokratikong sektor.

Sa harap ng mga protesta, nilantad ng dati kasapakat na kongresman ni Marcos na mismong siya ay tumanggap ng ₱25 bilyong "SOP," at na siya mismo ang utak sa likod ng pagpasok ng maaanomang proyekto sa badyet ng kanyang gubyrno. Para iligtas ang kanyang sarili, napwersa si Marcos na isakripisyo ang malalapit niyang upisyal na pinangalanang sangkot sa pangungulimat, bagay na lumikha ng mga lamat at nagpasidhi ng hidwaan sa pagitan ng magkakatanggaling pangkatin sa loob ng Malacañang. Sa pamamagitan ng kunwaring imbestigasyong ipinagutos ni Marcos, pilit pinagtatakpan ang kanyang tuwirang pananagutan sa korapsyong sa mga proyektong *flood-control* na pinondohan sa kanyang tuwirang utos sa ilalim ng "unprogrammed appropriations."

Sa pagdaloy ng kilusang protesta nabuo ang malawak na mga al-yansang anti-korapsyon sa buong bansa. Lumakas ang sigaw ng mga progresibo at demokratikong grupo, laluna ng mga kabataan, para sa pagpapabitiw o pagpapataks kay Marcos at Duterte, kahit pa tinangka ng *pseudo*-progresibong grupong Akbayan para ilihis ang galit ng taumbayan kay Marcos. Iniaabante ang panukala para itayo ang isang "national transition council" na hahalili sa gubyrnong Marcos-Duterte, itulak ang pagtitiyak ng mga hakbangin para panagutin ang

mga nasangkot sa korapsyon, at isakatuparan ang mga pagbabago sa sistema ng eleksyon at pamahalaan. Bagaman nasa balangkas pa rin ito ng kasalukuyang sistema, at hindi maghahatid ng pundamental na pagbabago sa sistema, ang ganitong panawagan ay sadyang salamin ng malalim na pagkadismaya at kawalang tiwala ng taumbayan sa reaksyunaryong sistema at sa mga naghaharing uri, sa harap ng pabalik-balik na kaso ng korapsyon sa nagdaang mga dekada.

Upang pigilan ang paglaki ng mga kilos protesta sa lansangan, ginamit ni Marcos ang mga pwersa ng pulis at militar sa pagsupil sa mga demokratikong karapatan. Noong Setyembre 21, sa ika-53 anibersaryo ng batas militar, mahigit 270 ang inaresto sa Mendiola nang sumiklab ang kumprontasyon sa pagitan ng mga pulis at ng mga kabataang matapang na lumaban. Sa rali noong Nobyembre 30, ginawang mistulang garison ang Malacañang na pinalibutan ng libu-libong pulis para hindi madinig ni Marcos ang mga sigaw ng taumbayan.

Ang naging pagsupil sa mga rali ay isang bahagi lamang ng papatinding pasistang panunupil ng rehimeng Marcos. Inilabas ni Marcos ngayong taon ang National Action Plan for Unity, Peace and Development (NAP-UPD) na ngayo'y nagsilbing plano sa malawakang pagsupil sa mga demokratikong karapatan sa balangkas ng *counter-insurgency*. Ginagamit nito ang Anti-Terror Law at Anti-Financing Terrorism Law upang ipitin ang mga samahang masa at mga organisasyong *civil society*, idawit ang mga ito sa rebolusyonaryong kilusan, at supilin ang kanilang mga aktibidad.

Sa kalunsuran, isinasagawa ng mga ahente ng estado ang sarbey-lans, panggigipit at paninindak para pigilan ang pag-uunyon ng mga manggagawa at pag-oorganisa ng mga kabataan at iba pang sektor. Ang mga kilalang lider o kalahok sa mga kilos protesta ay target ng

"pagbisita sa bahay" ng mga pulis upang "kumbinsehin" silang tumiwalag sa kanilang mga organisasyon at huwag lumahok sa mga pagkilos. Kaliwa't kanan ang pagsasampa ng gawa-gawang kaso, kabilang ang bantang pagkakaso ng pulis sa mahigit 90 lider-kabataan at mga kalahok sa rali noong Setyembre 21 sa Mendiola.

Sa balangkas rin ng NAP-UPD, patuloy na ipinapataw ng AFP, kasabwat ang NTF-Elcac, ang *de facto* na batas militar sa daan-daang barangay sa buong bansa. Ipinatutupad ang mga hakbanging mapaniil at mapang-api sa masang magsasaka, kabilang ang pagtatakda ng limitadong oras sa pagtatrabaho ng mga magsasaka sa kanyang bukid, pagpapapirma sa *logbook* sa paglabas o pagpasok sa baryo, pagtatakda ng limitadong dami ng bigas na pwedeng bilhin, pagpapataw ng karpyu, at iba pang patakaran ng pagkontrol sa kilos ng taumbaryo. Ipinapakat ang mga pangkat ng mga sundalo sa mga barangay o kulumpon ng mga baryo ng mga magsasaka, laluna ang mga pinaghihinalaan ng AFP na sumusuporta sa rebolusyonaryong kilusan, sa ngalan ng pagpigil sa pagsuporta sa Bagong Hukbong Bayan (BHB).

Ang imperyalismong US ang pangunahing tagapayo at tagabigay ng suporta sa pinansya at materyal sa operasyong kontra-insurhensya ni Marcos at ng AFP. Walang-lubay ang panggagalugad ng AFP sa mga baryo at mga operasyong laban sa BHB. Patuloy ang mga *triad* o tatluhang operasyong saywar, intelidyens at kombatan, sa desperadong tangkang gapiin ang hukbong bayan o pigilan ang mga pwersang gerilya na maggawaing masa sa mga baryo. Sa mga lugar na nasa ilalim ng *focused military operation* ng mga dibisyon at *area command* ng AFP, isinasagawa ang malawak na mga operasyon sa magkakanugnog sa pinaniniwalaan nitong mga sonang gerilya ng BHB. Bata-batalyon ang ginagamit ng AFP para habulin ang mga gerilyang platoon o iskwad ng hukbong bayan. Ka-

sabay ito na ginagamit ang pakang amnestiya para sa saywar. Mula 2023, ginamit ni Marcos at kanyang mga sugo ang sikretong pakikipag-usap sa NDFP sa tangkang siluin ito sa usapang pagsurender ng rebolusyonaryong kilusan.

Nagpapakalat rin ito ng mga iskwad o pangkat ng mga pasistang sundalo, minsa’y nagpapanggap na mga pwersang gerilya sa tangkang linlangin ang masa. Gumagamit rin ang AFP ng masasamang elemento sa baryo para ipuslit ang mga kagamitang elektroniko (GPS *tracker*) sa pwesto ng mga yunit gerilya, upang asintahin ang mga Pulang mandirigma ng pangananyon, istraping at pambobomba mula sa ere gamit ang mga FA-50 *jet fighter* o Super Tucano na pang-atakeng eroplano.

Saanman at kailanman isinagawa ng AFP ang mga operasyong kontra-gerilya, kasama sa target nito ang masang magsasaka sa baryo. Tuwing magkaroon ng armadong engkwentro, pwersahang pinalilikas ang masa sa kanilang mga baryo bilang pagparusa sa taumbaryo na paniniwalaan ng mga pasistang upisyal ng AFP na sumusuporta sa BHB. Sa nakaraang taon, mahigit 7,600 mga magsasaka ang biktima

ng sapilitang pagbakwit.

Bahagi sila ng kabuuang halos 240,000 naging biktima ng pasistang panunupil at pandarahas ng rehimeng US-Marcos mula Disyembre 2024. Kabilang dito ang 40 biktima ng pamamaslang, 34 ng iligal na pagdukot, at mahigit 300 ng pagtortur. Pangunahing target ng pasistang rehimeng US-Marcos ang mga grupo o pwersang aktibo sa pagtatanggol sa karapatan ng masang magsasaka at manggagawa, at nagsusulong ng pambansa at demokratikong hangarin ng bayan.

Taliwas sa kasunduan ng reaksyunaryong gubyrno sa mga pwersang Moro na kumikilala sa nagsasariling gubyrno sa Bangsamoro Autonomous Region of Muslim Mindanao, patuloy na pinanghihimasukan ni Marcos at ipinapataw ang kanyang kapangyarihan sa mga usaping panloob ng Bangsamoro Transition Authority, na ilang ulit nang naantala ang pagdaraos ng eleksyon. Nasa balag ngayon ng alanganin ang kasunduang pangkapayapaan sa harap ng kabiguan ni Marcos na tuparin ang mga obligasyon ng gubyrnong Maynila sa kabila ng pagsalong ng armas ng ilanlibong pwersa ng Bangsamoro Islamic

Freedom Fighter ng Moro Islamic Liberation Front. Patuloy ang reklamo ng masang Moro ng pang-aabuso ng mga pasistang pwersa ng AFP laban sa kanilang mga karapatan.

Katulad ng paulit-ulit na ipinakita sa kasaysayan, walang anumang tindi ng pasistang panunupil ang makapipigil sa pagbabangon ng sambayanan. Katunayan, habang sumasahol at lumalawak ang panunupil, lalong sumisidhi ang paghangad ng bayan na magtanggol at lumaban.

Sa harap ng lumalalim na krisis ng malakolonyal at malapyudal na sistema sa Pilipinas, at kaakibat nitong paglubha ng pagdurusa at paghihirap ng sambayanan, ay lumilikha ng napakainam na kalagayan para sa pagsusulong ng demokratikong rebolusyong bayan. Dapat sunggaban ng Partido ang pagkaka-taon para higit na magpalawak at magpatatag sa balangkas ng pagpuspos at pagpapalalim ng kilusang pagwawasto. Katuwang ng lahat ng rebolusyonaryong pwersa, dapat ibayong magpakahusay sa gawaing masa para pukawin, organisahin at pakilusin ang milyun-milyong mamamayan sa landas ng rebolusyonaryong pakikibaka.

III. Kalagayan at mga tungkulin para ibayong palakasin ang Partido at rebolusyonaryong kilusan

Sa tulak at gabay ng kilusang pagwawasto sa nagdaang dalawang taon, patuloy na lahatang-panig na nagpapalakas ang Partido sa ideolohiya, pulitika at organisasyon. Buong ang determinasyon ng mga kadre sa lahat ng antas ng Partido na tukuyin, punahin at pangibabawan ang mga naging kahiranaan at pagkakamali sa nakaraan at dalhin sa bagong antas ang ating rebolusyonaryong praktika.

Malinaw na malinaw na ipinakikita ng masidhing krisis ng malakolonyal at malapyudal na sistema sa bansa at ng pandaigdigang sistemang kapitalista na nananatiling tumpak, makatwiran at mahigpit ang pangangailangang isulong ang demokratikong rebolusyong bayan sa Pilipinas. Ito lamang ang paraan para ganap na lumaya ang sambayanang Pilipino sa pang-aapi ng imperyalismo, pyudalismo at burukra-

tang kapitalismo, at ipundar ang maningning na sosyalistang hinaharap.

Mula sa dinanas na mga pagatras at pinsala ng Partido at rebolusyonaryong kilusan, nakamit natin sa nagdaang taon ang katamtamang mga pagsulong sa iba’t ibang larangan ng rebolusyonaryong gawain, kahit pa mayroong ilang bahaging nahuhuli, at may ilan na nagtamo ng pinsala dulot ng hindi

pa lubos na naiwawastong mga kahiranaan at sa harap ng walang-habasa na pag-atake ng kaaway.

Katuwang ang lahat ng rebolusyonaryong pwersa, ibayong nagpapalakas ang Partido para mangulo sa pagsusulong ng demokratikong rebolusyong bayan sa pamamagitan ng matagalang digmang bayan. Mahusay ngayon na nakapwesto ang Partido para pamunuan ang malawak na masa ng sambayanan sa lahat ng larangan ng pakikibaka, pangunahin sa larangan ng armadong pakikibaka.

Higit nating pinatatag ang pundasyong pang-ideolohiya ng Partido mula nang sinimulan natin noong 2023 ang kilusang pag-aaral sa

Marxismo-Leninismo-Maoismo at sa mga saligang prinsipyo ng Partido. Layunin ng kilusang pag-aaral ang iwaksi, pangunahin ang empirismo, sekundaryo ang dogmatismo sa ideolohiya; iwaksi ang konserbatisimo, liberalismo, buntotismo at sektoralismo, sa pulitika; at ang burukratismo at ultra-demokrasya sa organisasyon. Sa pamamagitan ng punahan at pagpuna-sa-sarili, kaalinsabay ang pagwawasto, ibayong pinalalakas ang pagkakaisa ng mga kadre at komite ng Partido.

Sa pangunguna ng Komite Sentral, higit na pinalalalim ang kilusang pagwawasto sa pamamagitan ng paglalagom sa ating mga karanasan. Humahalaw tayo ng mga aral sa una at ikalawang dakilang kilusang pagwawasto, kasabay na nagbabalik-tanaw tayo sa kasaysayan ng pagtatayo at paglawak Partido mula nang itinatayo ito 57 taon na ang nakaraan.

Patuloy na pinalalakas at pinanauunlad ng mga kadre at komite ng Partido ang panlipunang pagsisiyasat at pagsusuri sa uri (*SICA o social investigation and class analysis*) sa saklaw ng kani-kanilang pamumuno. Layunin sa pagbubuo at pagpapalalim ng mga SICA ang tukuyin ang mga pangunahing problema at mga isyu na kinakaharap ng malawak na masa, laluna ang mga anyo ng pang-aapi at pagsasamantala sa mga batayang uri at sektor, at ang angkop na mga paraan o taktika para isagawa ang malawakang pagpupukaw, pag-oorganisa at pagpapakilos sa kanila. Sa batayan lamang ng paggawa ng SICA mabubuo ang wastong plano at panawagan na tiyak na yayakapin ng masa at magpapasigla ng kanilang mga pakikibaka.

Bilang tugon sa panawagan ng Partido, tuluy-tuloy na pinalalakas at pinasisigla ang mga rebolusyonaryong organisasyong masa ng mga manggagawa, magsasaka, kabataan, kababaihan, guro, mga alagad ng sining, manggagawang pangkalusugan, taong-simbahan, syentista, abugado, katutubong

mamamayan, migrante sa labas ng bansa at iba pa. Sa pamamagitan ng mga rali at iba't ibang anyo ng pagpropaganda, pinalalakas nila ang panawagang isulong at lumahok sa digmang bayan.

Tinitipon at kinokonsolida nila ang abanteng bahagi ng masang lumalahok sa mga pakikibakang masa. Nagsisilbi silang lihim na gulugod ng malawak na hayag na kilusang masa na gumagabay upang hindi malihis sa repormismo ang masa sa kanilang mga pakikibaka. Sa kalunsuran, lumalakas ang panawagan para sa pagpapalista, laluna mula sa hanay ng mga petiburges na intelektwal, para magtungo sa kanayunan para sa pansamantala o pangmatagalang deployment. Hindi matatawaran ang kanilang nagiging ambag sa pagpapasigla sa gawaing pang-edukasyon, pangkultura at iba pang aspeto ng gawain sa hukbong bayan.

Alinsunod sa patakaran ng mapangahas na pagpapalawak na walang pinapapasok ni isang di kanais-nais, matatag nating pinalalakas ang hanay ng Partido sa pamamagitan ng pagrerekrut mula sa bagongusbong na mga rebolusyonaryong sa kilusang masa, kapwa sa kalunsuran at kanayunan. Nagagawa ito dahil ang mga kadre at kasapi ng Partido ay nasa ubod ng mga pakikibakang masa at kasama ng masa sa kanilang mga pagkilos. Nakakalat sila sa buong bansa.

Kung saan may hindi bababa sa tatlong kasapi, binubuo natin ang sangay ng Partido bilang batayan nitong organisasyon. Ang pagpaparami at pagpapalakas ng mga sangay ang sukatan ng lawak at lalim ng pagkakaugat ng Partido sa masa, at ng kakayahan nitong pamunuan ang masa sa rebolusyonaryong landas. Ang mga sangay ng Partido ang nasa ubod at taliba ng mga rebolusyonaryong organisasyong masa at ng kanilang mga pambansa at demokratikong mga pakikibaka.

Sa kalunsuran, itinatayo natin ang mga sangay sa mga pagawaan at lugar ng pagtatrabaho, sa mga

maralitang komunidad, sa mga paaralan, tanggapan, at iba pang lugar. Sa kanayunan, binubuo natin ang mga sangay ng Partido sa mga baryo o kulumpon ng mga baryo. Sa mga lugar na nabuwag sa harap ng panunupil ng kaaway o ibang dahilan, puspusing ngayon na muli itong itayo.

Partikular sa kanayunan, ang pagtatayo ng mga sangay at komite ng Partido ang susi para pamunuan ang malawak na masa sa kanilang mga pakikibaka para sa reporma sa lupa, at sa armadong pakikibaka. Sa pamumuno ng Partido, itinatayo ang mga Komiteng Rebolusyonaryo sa Baryo, o organo ng kapangyarihang pampulitika na siyang nagkakaisang prente sa baryo, sa pundasyon ng mga saligang samahang masa ng mga magsasaka, kabataan, kababaihan at mga bata, at mga manggagawang pangkultura, kasama ang rebolusyonaryong samahan o kaisahan ng mga panggitnang pwersa sa baryo. Dagdag dito, binubuo ng Partido ang alyansa sa pagitan ng taumbaryo, sa masa at panggitnang pwersa sa mga kabayanan.

Inaarmasan ng Partido ang masa. Binubuo at pinakikilos natin ang mga yunit ng milisyang bayan bilang pormasyon ng Bagong Hukbong Bayan, katuwang ang mga kwerpong pananggol-sa-sarili ng mga samahang masa, para isulong ang malawak na pakikidigmang gerilya. Kung saan man nakabuo, ang mga yunit ng milisyang bayan ay tumutulong sa pagpapalakas ng mga pultaym na yunit ng hukbong bayan kung saan mayroong nakatayo, at kung saan wala, nagkukusa na itayo ang mga bagong mga yunit gerilya ng hukbong bayan. Kung saan maaaring buuin, palawakin at palakasin ang mga pwersang gerilya ng BHB, itinatatag ng Partido ang mga sona at larangang gerilya bilang lunsaran ng armadong pakikibaka para sa baha-bahaging paggapi sa kaaway.

Sa gabay at inspirasyon ng kilusang pagwawasto, patuloy na binibigong ng Partido ang walang-habas

na teroristang gera at saywar ng imperyalismong US at pasistang rehimeng Marcos, sa deklaradong layunin nitong gapiin ang Partido, ang Bagong Hukbong Bayan at buong rebolusyonaryong kilusan. Hindi magugupo ang Partido dahil taglay nito ang walang maliw na katapatan sa proletaryong ideolohiya, prinsipyo at simulain, at ang pinanday sa apoy na kapasyahang paglingkuran ang sambayanan.

Tuluy-tuloy na binibigo ng BHB ang mga “nakapokus na operasyong militar” ng AFP sa pamamagitan ng pagkakait dito ng pokus o target. May ilan pang napinsala, na kadalasa’y dulong ng internal na mga kahinaan. Ang tuluy-tuloy na pagpupunyagi ng BHB sa iba’t ibang rehiyon ay malaking sampal sa pasistang si Marcos na buong yabang na nagdeklara noong Hulyo na “wala nang grupong gerilya” sa bansa.

Tangan ang mga aral ng kilusang pagwawasto, isinagawa ang pagsasaayos sa organisasyon at kumand ng hukbong bayan upang masaklaw at makakilos ang mga ito sa mas malawak na erya, at mas mabilis at mas lihim na nakapaglilipat-lipat. Sa kalakhan, napananatiling bingi at bulag ang kaaway, mas naiiwasan ang mga labanang dependsiba, napreserba ang lakas at unti-unting muling nakapagpalawak ang BHB. Nabawi o nabalikan nito ang dati nitong mga base, habang nakapagpapalawak sa mga bagong erya. Sa determinasyong lumaban at aktibong pagdependa, nasasalag at nagagapi ng BHB ang mga atake ng kaaway. Tanda ng pagbawi, may ilang yunit na nakapaglunsad ng maliliit na taktikal na opensiba. May mga yunit na mas abante ang karanasan sa pagwawasto at muling pagpapalakas, habang mas marami pa ang humahabol, at may ilan pang nahuhuli.

Susi sa lahat ng ito ang malapot na ugnayan at malalim na pag-ugat ng BHB sa masa, at ang pag-angkop ng organisasyon at mga gerilyang taktika ng pagkilos ng hukbo. Upang magawa ito, pinasisigla ng mga Pu-

lang mandirigma ang pagtulong sa masa sa produksyon, pagbibigay ng serbisyong pangkalusugan at edukasyon, at pagpapalakas ng gawing pangkultura. Tumutulong ang BHB sa pagbubuo at pagpapalalim ng mga SICA, pagbubuklod sa masa at pagtataas ng kanilang kapasyahan na ipagtanggol at ipaglaban ang kanilang kapakanan.

Patuloy ding nilalabanan ng BHB at mga rebolusyonaryong pwersa ang walang patid na mga operasyong intelidyens, saywar at pagpapasurender ng kaaway sa tabing ng “lokalisadong usapang pangkapayapaan”. Puspasang inilalantad natin na walang katuturan ang ipinangako ng AFP at NTF-Elcac na “magandang buhay” pangunahin na sa dahilang hindi nito nilulutas ang saligang problema sa kawalan ng lupa, at laluna dahil pawang kabulastugan ang ipinagmamalaking mga programa sa “reintegrasyon.” Inilalantad din ang tadtad ng korapsyong mga huwad na “pangkunlarang proyektong” imprastruktura na binubuhusan ng bilyun-bilyong piso, na ibinubulsa ng mga upisyal militar at kasabwat na kontraktor. Lalong mahalaga, inilalantad na ang tunay na layunin ng ipinapangakong “kapayapaan” ay ang pagsupil sa masa upang malayang makapasok ang mga dayuhang kapitalista at kasabwat na mangangamkam ng lupa at likas na yaman.

Sa nagdaang mga taon, sadyang may ilang elementong nagtraydor sa Partido at nagkanulo sa masa. Labis sila ngayong nahihiwalay sa masa at ganap na kinamumuhian. Marami sa kanila ay ibinabawala sa pinabayaan na ng kaaway matapos mawalan ng silbi sa saywar. Ang mga pinakapusakal na naging kriminal na aset ng kaaway ay kinakasuhan sa hukumang bayan at pinapatawan ng angkop na kaparusahang hinihingi ng masa, katumbas ng kasalananang nagawa nila.

Ang malaking mayorya, ang 99%, ng mga kasapi ng Partido at mga rebolusyonaryong organisasyong masa, ay nanatiling tapat sa

mga prinsipyo at simulain ng Partido. May mga bahaging napasibo dahil sa matinding pasistang paniniil. Subalit madali silang natitipong muli matapos maliwanagan sa mga tungkuling dapat gampanan.

Sa pamamagitan ng paninindigan para sa makatarungan at matagalang kapayapaan, patuloy ding binibigo ang mga tangka ng rehimeng US-Marcos na bitagin ang National Democratic Front sa patibong ng pagsuko ng armadong rebolusyon. Sa nagdaang dalawang taon, walang naging makabuluhang pagsulong sa mga pag-uusap ng mga kinatawan ng NDF at ng Gubyerno ng Republika ng Pilipinas (GRP) para buhayin muli ang pormal na usapang pangkapayapaan.

Pangunahing dahilan ng pagkabalaho ng usapang pangkapayapaan ay ang pagpupumilit ni Marcos na ibasura ang lahat ng nabuong kasunduan sa nagdaang mahigit 30 taon ng negosasyong NDFP-GRP, kabilang ang The Hague Joint Declaration, ang Joint Agreement on Safety and Immunity Guarantees (JASIG), ang Comprehensive Agreement on Respect for Human Rights and International Humanitarian Law at iba pa. Ipinakikita ni Marcos na hindi niya kayang pangatawanan ang pirma ng GRP, bagay na nakasisira sa tiwala ng NDFP at sambayanan.

Pinipilit ni Marcos na “simulang muli” ang usapan sa balangkas ng “demobilisasyon at pagdidis-arma” sa BHB, na hindi muna nilulutas ang mga saligang suliranin ng mamamayan, na siyang nasa ugat ng digmaang sibil sa bansa. Matatag na nanindigan ang delegasyon ng NDFP kontra sa pakanang ito. Kung hindi babaguhin ng rehimeng Marcos ang militaristang tindig nito sa usapan, nakahanda ang mga rebolusyonaryong pwersa na isuspinde ang pag-uusap sa GRP, hanggang mapalitan si Marcos ng nawa’y mas bukas ang isip na resolbahin ang mga saligang problema ng lupa at kawalang kataungan. Mayroon man o walang usapang pangkapayapaan sa GRP,

buo ang kapasyahan ng Partido na isulong ang mga rebolusyonaryong pakikibaka para ipaglaban ang pambansa at demokratikong hangarin ng sambayanan.

Napakainam ng obhetibong sitwasyon sa loob ng bansa at sa buong daigdig para isulong ang mga rebolusyonaryong pakikibaka. Masasabi ring mainam ang suhetibong sitwasyon—na dahil sa kilusang pagwawasto, ang Partido at lahat ng rebolusyonaryong pwersa ay nasa mas mahusay ngayong katayuan, kumpara sa dalawang taon ang nakaraan, para sunggaban ang mga pagkakataon para pamunuan ang malawakang pagsulong ng demokratikong rebolusyong bayan sa mga darating na taon. Gayunman, sadyang malalaki ang kinakaharap nating hamon at mabibigat ang tungkuling dapat nating isabalikat sa darating na isa o dalawang taon para palakasin ang Partido sa ideolohiya, pulitika at organisasyon, upang maitaas ang kakayahan niting pakilusin ang milyun-milyong mamamayan sa landas ng demokratikong rebolusyong bayan sa pamamagitan ng matagalang digmang bayan.

Sa ideolohiya, dapat patuloy na palalimin at palawakin ang kilusang pagwawasto sa pagpasok nito sa ikatlong taon, na may walong bahagi o aspeto: isang Marxista-Leninista-Maoistang kampanyang pag-aaral, isang kampanya para sa malalimang pag-aaral sa konstitusyon at programa ng Partido, isang kampanyang pagbabalik-aral sa mga dokumento ng Una at Ikalawang Dakilang Kilusang Pagwawasto, isang kampanyang paglalagom, isang kampanya ng panlipunang pagsisiyasat at pagsusuri sa uri (SICA), isang kampanya ng pagpuna at pagpuna-sa-sarili, isang kampanya ng ebalwasyon at promosyon ng mga kadre, at isang nagpapatuloy na kampanya para tiyakin ang pagpapatupad ng tatlong-antas na kurso sa edukasyon ng Partido.

Katulad ng naging pagdidiin natin sa nakaraan, ang kilusang pag-

wawasto, sa pangunahin, ay isang kilusang pag-aaral, para itaas ang teoretikong kaalaman ng mga kadre at kasapi at pahigpitin ang gagap sa linyang pang-ideolohiya, mga prinsipyo at patakaran ng Partido. Ito ang susi para maitaas natin ang ating rebolusyonaryong praktika. Dapat pahasayin ang pamamaraan at estilo ng paggawa upang mapalaki ang kinakamit na target, mapalalim at maiwasto ang pag-iisip at kaparaanang nagiging sagka o bara sa mas malaking pagsulong. Magpapatuloy ang kilusang pagwawasto hanggang mapagpasyang natukoy, nawaksi at napangibabawan ang mga naging kahinaan at pagkakamali sa nakaraan, at makamit natin ang tiyak na direksyon ng paglawak at pagsulong.

Mahigpit na mahigpit ang pangangailangang ihabol ang paglalagom sa lahat ng antas at larangan ng gawain, laluna sa nagdaang 20-25 taon mula sa katapusan ng ikalawang dakilang kilusang pagwawasto. Ang paglalagom sa panahong ito ang magbibigay sa atin ng higit na malalim na pag-unawa sa pangkasaysayang balangkas ng mga naging kahinaan natin sa nagdaang mga taon. Tungkulin ng Komite Sentral na pangunahan ang paglalagom na ito, katuwang ang lahat ng komiteng panrehiyon sa buong bansa.

Hinihingi rin sa lahat ng komite ng Partido na bigyan ng prayoridad ang pagbubuo ng SICA, na nakatuon sa sistematikong pagtukoy sa pinakakagayat na mga panlipunan at pang-ekonomyang usaping kinakaharap sa saklaw at antas ng kanilang pamumuno. Susi ang pagbubuo ng SICA sa pagpapasigla ng mga pakikibaka ng masa para ipaglaban ang kanilang interes. Sa batayan nito dapat buuin ang plano para bigkisin at pakilusin ang malawak na masa.

Dapat ding isagawa ang mga espesyal na teoretikong pag-aaral sa mga tampok na isyu na kinakaharap ng sambayanan. Sa harap ng tampok na usapin ng korapsyon sa

ilalim ng rehimeng Marcos, dapat masusing pag-aralan ng lahat ng kasapi ng Partido ang burukratang kapitalismo, sa gabay ng teoretikong artikulo na inilabas ng Komite Sentral. Ang mga artikulo sa Rebolusyon ay dapat matamang pag-aralan ng lahat ng kasapi ng Partido.

Sa organisasyon, mapangahas na palawakin ang Partido na hindi nagpapapasok ni isang hindi kanaisnais na elemento. Rekrutin bilang mga kandidatong kasapi ang pina-kaabanteng mga elemento mula sa mga aktibistang masa na hindi bababa sa 18 taong gulang, handang tanggapin ang Marxismo-Leninismo-Maoismo at ang konstitusyon at programa ng Partido, at sumasang-ayon na puspusang gumampan ng gawain sa alinmang organisasyon ng Partido at regular na magbayad ng butaw. Tanggapin sila bilang mga ganap na kasapi matapos ang panahon ng kandidatura na itinatakda sa konstitusyon.

Dapat patuloy na konsolidahin at palakasin ang Partido alinsunod sa demokratikong sentralismo, o demokrasyang ginagabayan ng sentral na pamumuno, at sentralismong nakabatay sa demokrasya. Ipagpatuloy ang mahigpit na pagpapatupad ng mga desisyon ng Komite Sentral at ng mga namumunong komite ng Partido para sa sabay-sabay ang pagmartsa pasulong.

Palakasin ang sistemang komite sa pamamagitan ng pagtitiyak ng regular at sistematikong pagpupulong ng mga komite para buuin ang kolektibong kapasyahan sa mga kinakaharap na usapin, at upang kolektibong isabalikat ang mga plano. Buuin ang komiteng tagapagpaganap at kalihiman ng mga namumunong komite para sa araw-araw na pamumuno at pagsubaybay sa mga gawain. Tiyakin na mahigpit na nasusubayan ng kolektibo ang mga indibidwal sa pagpapatupad ng mga tungkulin.

Patuloy na palakasin ang sistema ng regular at espesyal na pag-uulat sa nakatatasa na organo at matamang paggabay sa mga naka-

babang komite. Patuloy na palakasin ang iba't ibang sistema o paraan ng pasahan ng komunikasyon.

Mahigpit na ipatupad ang mga patakaran sa seguridad bilang kru-syal na tungkulin sa organisasyon. Mahigpit na ipatupad ang mga patakaran sa paggamit ng kompyuter, gadyet pang-komunikasyon at kagamitang elektroniko, sistema ng pagsususi at pag-iingat sa mga *computer files*, pagkokoda sa mga talaan, at “paglagot sa lastiko” sa mga *fixed point*, laluna ng maiinit at namumunong kadre. Dapat tiyakin ng mga yunit ng BHB ang lihim na gerilyang pagkilos, paggamit ng mga sikretong ruta, pagrerekisa sa mga gamit na ipinapasok sa yunit, at pagtuturo ng kilusang lihim sa masa.

Tukuyin at mulat na sanayin ang ikalawa at ikatlong hanay ng mga namumunong kadre. Dapat silang magpakahusay sa teorya at sa komprehensibong paggagap sa mga prinsipyo at patakaran ng Partido. Dapat natin silang sanayin bilang mga mga propesyunal na rebolusyonaryo na yayakapin bilang kanilang habambuhay na karera ang pagsisilbi sa Partido at rebolusyon. Mapahangas silang bigyan ng bagong mga atas at tungkulin, at ita-laga sa mga bagong gawain sa ibang larangan ng gawain o lugar.

Isakatuparan ang patakaran ng “simpleng pamumuhay, puspusang pakikibaka.” Mahigpit na tumalima sa mga nakatakdang mga pamantayan sa gastusin ng mga komite at indibidwal. Dapat sikapin ng lahat ng komite ng Partido na umasa sa sarili. Magpasulpot ng kinakailangang rekurso para sa sariling operasyon, at gawin ang ubos-kaya na mag-ambag sa sentral na pondo ng Partido.

Sa pulitika, dapat nating puspusang palakasin ang Bagong Hukbong Bayan at pasiglahin ang rebolusyonaryong armadong pakikibaka, isulong ang rebolusyonaryong kilusang masa sa kalunsuran at kanayunan, palaparin ang pambansang nagkakaisang prente, at payabun- ngin ang gawaing internasyunal.

Ang Bagong Hukbong Bayan ang pangunahing organisasyon na nasa mahigpit na pamumuno ng Partido. Dapat natin itong puspusang palakasin upang isulong ang rebolusyonaryong armadong pakikibaka bilang pangunahing anyo ng pakikibaka sa pagsulong ng mata- galang digmang bayan.

Nasa mahusay na katayuan ngayon ang hukbong bayan para ibayong magpalakas. Ito ay mata- pos nating iayos ang organisasyon at operasyon nito na nakatuon pa- ngunahin sa pagpapalalim at pag- papalawak ng baseng masa, para tulungan ang masa sa pagsusulong ng kanilang mga pakikibakang anti- pyudal at anti-pasista, at pagpapa- sigla ng kanilang pagsuporta at paglahok sa armadong pakikibaka.

Palakasin at palawakin ang ga- waing masa ng mga yunit ng huk- bong bayan at tulungan ang masa na pasiglahin at itaas ang antas ng kanilang paglaban. Kaalinsabay ni- to, itaas ang kakayahan ng hukbong bayan sa paglulunsad ng pakikipag- digmang gerilya. Puspusang itaas ang husay ng hukbong bayan sa paggamit ng taktika ng konsentra- syon, dispersal at paglilipat upang pirming hawakan ang inisyatiba sa militar at pulitika. Panatilihing bu- lag at bingi ang kaaway sa presen- sya at kilos ng mga yunit gerilya. Labanan at biguin ang mga opera- syong kombatan, saywar at intelid- yens ng kaaway.

Dapat panatilihin ng mga yunit ng BHB na mataas ang pampuliti- kang kamulatan, disiplinang militar at panlabang diwa ng mga Pulang mandirigma. Mahigpit na sundin ang mga alituntunin sa paghihimpil, sa paglalakad at sa paggagawaing masa.

Pakilusin natin ang mga iskward at platun ng BHB para ikalat ang armadong pakikibaka sa malawak na kanayunan, katuwang ang mga yunit ng milisyang bayan at mga kwerpong pananggol-sa-sarili. Pwersahin ang kaaway na banating manipis ang kanyang lakas, upang lumikha ng mas maraming oportu-

nidad para sa mga taktikal na open- siba.

Ilunsad ang kakayaning ipagta- gumpay na mga taktikal na opensiba para parusahan ang mga pusakal na pasistang kriminal, mga elementong paramilitar, at mga kinakasangka- pang elementong nagtraydor sa masa, at samsamin ang kanilang mga sandata. Ilunsad ang kinakai- langang armadong aksyon para ipagtanggol ang interes at kapaka- nan ng masa laban sa mga nanga- ngamkam ng lupa, mga nandaram- bong at sumisira sa kalikasan at kri- minal na burukrata-kapitalistang magnanakaw sa pondo ng bayan.

Dapat nating isabay ang pagsu- long ng rebolusyonaryong arma- dong pakikibaka sa pagpapalawak at pagpapasigla ng mga pakikibaka ng masang magsasaka sa kanayu- nan. Puspusang isulong ang mga pakikibakang anti-pyudal at anti- pasista, na ikinakawing sa mga pa- kikibakang anti-imperyalista. Dapat palakasin ang kilusang magsasaka para sa reporma sa lupa, alinsunod sa minimum at maksimum na layu- ning itinakda sa Rebolusyonaryong Gabay para sa Reporma sa Lupa (RGRL) ng Partido.

Dapat isulong sa kanayunan ang malawakang pakikibaka para ibaba ang upa sa lupa, pawiin ang usura at itaas ang sahod ng mga mangga- gawang-bukid. Dapat abutin ng kampanyang ito ang pinakamalawak na posibleng bilang ng mga magsa- saka. Maaaring ipatupad ang mak- simum na programa ng pamamahagi ng lupa kung saan kaya itong ipag- tanggol ng armadong lakas at kung saan kaya itong pangasiwaan.

Kaakibat ng pakikibaka para sa reporma sa lupa, dapat isulong ang mga pakikibaka para sa pagtatang- gol sa lupa laban sa pangangamkam ng mga dayuhang malalaking kum- panya, kasabwat ang mga pangino- ong maylupa at malalaking burge- syang kumprador, at laban sa pag- papalit-gamit ng mga sakahan para sa pagpapalawak ng mga minahan, plantasyon, mga proyektong ekotu- rismo, *real estate*, “renewable

energy,” dam, at iba pa. Ang mga patakarang ito ay nagpapahirap sa masang magsasaka at nagkakait sa kanila ng kabuhayan, habang pinpinsala rin ang produksyong pang-agrikultura at kakayahan ng bansa na lumikha ng sapat na pagkain para sa mamamayan.

Kaalinsabay nito, dapat isulong ang malawak na pakikibaka para sa makatwirang presyo ng mga palay, sibuyas, bawang mga gulay at iba pang mga produktong bukid, at paglaban sa liberalisasyon sa importasyon ng mga produktong pang-agrikultura. Dapat buuin ang malawak na bukluran ng masang magsasaka sa iba’t ibang linya ng pananim. Dapat ding patuloy na ilantad at labanan ang huwad na reporma sa lupa at iba pang programa ng estado, na nagpapadali at ginagawang ligal ang pangangamkam ng lupa, kabilang ang SPLIT program ng World Bank, at “new emancipation law” ni Marcos.

Sa rebolusyonaryong kilusang masa sa kalunsuran, bigyan natin ng prayoridad ang ibayong pagpapalakas ng pag-oorganisa at pagpapakilos sa hanay ng masang manggagawa, sa mala-proletaryado at mga kabataang estudyante. Palakasin ang pag-oorganisa sa hanay ng mga manggagawang industriyal sa pinakamalalaking empresa sa pambansang sentrong lungsod at iba pang malalaking syudad sa iba’t ibang panig ng bansa. Kaakibat nito, palakasin ang pag-oorganisa sa mga manggagawa at mala-proletaryado sa mga maralitang komunidad sa kalunsuran. Ibayong palakasin ang pag-oorganisa sa mga kabataang estudyante sa mga mayor na syudad sa buong bansa.

Dapat palakasin ang mga pakikibakang pansektor, pang-ekonomiya at mga lokal na pakibaka, kaalinsabay ang mga pakikibakang anti-imperyalista, anti-burukrata kapitalista at antipasista, at pagsuporta sa mga pakikibakang magsasaka sa kanayunan. Dapat sikaping ibwelong muli sa pagpasok ng bagong taon ang kilusang protesta la-

ban sa korapsyon upang papanagutin si Marcos at Duterte bilang hari at reyna ng korapsyon, at ipanawagan ang kanilang pagbibitiw o pagpapatalsik.

Ilantad ang pagsuporta ng imperyalismong US sa korap na rehimg Marcos. Kaalinsabay nito, iluwal ang malawak na kampanyang propaganda laban sa papalaking presensya ng mga tropang Amerikano sa Pilipinas, paglalagak ng mga sandatang pandigma, pagtatayo ng dagdag na mga base at pasilidad militar, walang katapusang mga pagsasanay sa gera, at dala nito lumalaking banta na sumiklab ang digmaang kakaladkad sa bansa. Ilantad ang papel ng US at ng mga sagadsaring maka-US na grupong ginagamit nito sa pag-uudyok ng mga sigalot sa South China Sea.

Patuloy na palakasin ang mga lihim na rebolusyonaryong organisasyong masa, palakasin ang propaganda at panawagan para demokratikong rebolusyong bayan, sa gitna ng pagsulong ng malawak na hayag na kilusang masa. Hikayatin ang pinakamarami na sumuporta o lumahok sa armadong pakikibaka at mga pakikibakang magsasaka sa kanayunan.

Sa pamumuno ng uring manggagawa sa pamamagitan ng Partido, dapat patuloy na palakasin ang pambansang nagkakaisang prente para palawakin ang suporta para sa pambansa at demokratikong pakikibaka ng mamamayan. Dapat natin buklurin ang malawak na sambayanan laban sa imperyalismo, pyudalismo at burukratang kapitalismo. Dapat itong itayo sa matatag na pundasyon ng saligang rebolusyonaryong alyansa ng uring manggagawa at uring magsasaka, pangunahin na sa kongkretong anyo ng Bagong Hukbong Bayan, isang hukbong magsasaka na nasa ilalim ng absolutong pamumuno ng uring manggagawa, at iba pang anyo ng alyansa o pagbubuklod ng kilusang manggagawa mula sa kalunsuran sa kilusang magsasaka sa kanayunan.

Sa salalayan ng saligang rebo-

lusyonaryong alyansa mabubuo ang progresibong alyansa ng masang anakpawis at ng petiburgesyang lungsod; at ang mas malapad na patriyotikong alyansa ng mga progresibong pwersa at ng pambansang burgesa. Mabubuo rin ng Partido ang mga pansamantalang alyansa sa mga di matatag at di masasalalayang alyado, kadalasan sa isa o ilang bahagi ng naghaharing uri laban sa pinakareaksyunaryo, pinakapasista at pinakasunud-sunuran sa imperyalismong US.

Susi sa pagbubuo ng pambansang nagkakaisang prente ang pagkakaroon ng malakas na saligang rebolusyonaryong alyansa. Dapat mulat na magbantay sa Kanang oportunistang tendensyang mahila o mahulog sa repormismo o legalismo; o sa “Kaliwang” oportunistang tendensyang magsara ng pinto sa di maaasahan o di matatag na pwersa na makapag-aambag sa pagsusulong ng pambansa-demokratikong kilusan, sa tuwiran o di tuwirang paraan.

Sa kagyat na hinaharap, dapat sikaping buuin ang pinakamalapad na nagkakaisang prente laban kina Marcos at Duterte, na ngayo’y kapwa kumakatawan sa pinakareaksyunaryo at pinakapasistang paksyon ng naghaharing uri, upang ubos-ka- yang ihiwalay, labanan at patalsikin ang naghaharing rehimen.

Sa batayan ng lakas ng pagkilos ng masang anakpawis at petiburgesyang lungsod sa paglaban sa rehimg US-Marcos, dapat himukin ang maaalyadong pwersa, laluna sa mga institusyong pangkultura tulad ng mga simbahan at eskwelahan, at mga nasa serbisyong sibil, na aktibong ilantad at batikusin ang korapsyon at bulok na sistema. Dapat silang kabigin na pumanig sa rebolusyonaryong nagkakaisang prente.

Dapat ilantad at batikusin ang mga ahente ng imperyalismong US at buntot ng naghaharing uri na grupo tulad ng Akbayan sa panlilingan sa masa at paglilihis ng kaniilang pakikibaka.

Dapat tuluy-tuloy na palakasin

ng Partido ang rebolusyonaryong gawain sa ibayong dagat, sa pag-oorganisa ng mga migranteng manggagawang Pilipino, pagbubuo ng internasyunal na nagkakaisang prenteng anti-imperyalista at pag-papalakas ng pandaigdigang proletaryong pakikipagkapatiran.

Dapat mahigpit na buklurin ang mga migranteng Pilipino sa mga bansa kung saan sila ineempleyo upang labanan ang iba't ibang anyo pang-aapi at diskriminasyon ng kanilang mga dayuhang amo, gayundin ang mga pahirap na patakaran at panggigipit ng reaksyunaryong gubyerno sa Pilipinas. Dapat silang pukawin para iugnay ang kanilang mga paglaban sa pambansa-demokratikong pakikibaka sa bansa, at hikayatin silang umuwi at lumahok sa rebolusyonaryong kilusan.

Buuin ang pinakamalawak na lambat ng pakikipagkaibigan sa lahat ng mamamayan sa lahat ng dako ng mundo para suportahan sa lahat ng paraan ang rebolusyonaryong pakikibaka ng mamamayang Pilipino. Buuin sa kanilang hanay ang pinakamaraming grupong su-

musuporta at samahang nakikipagkaibigan, at himukin silang mag-ambag sa pambansa at demokratikong mga pakikibaka ng sambayanang Pilipino.

Tungkulin ng Partido na mag-ambag sa tuluy-tuloy na pagpapalakas ng pandaigdigang nagkakaisang prenteng anti-imperyalista. Dapat itulak ng Partido ang pagbubuo o pagpapalakas ng internasyunal na alyansang anti-imperyalista at mga kampanya laban sa imperyalismong US, na ngayon ay siyang numero unong imperyalista na nanunulsol at nag-uudyok ng mga armadong sigalot sa iba't ibang panig ng mundo.

Marapat na patuloy na palakasin ng Partido ang pakikipagkapatiran sa iba't ibang mga pwersang proletaryo sa iba't ibang bansa, upang itaguyod at palaganapin ang Marxismo-Leninismo-Maoismo at gamitin ito sa praktikal na aplikasyon sa iba't ibang bansa. Habang wala pang batayan para itayo ang isang sentrong internasyunal, sinusuportahan ng Partido ang mga teoretikal na talakayan, dayalogo,

at praktikal na tulungan ng mga partido at pwersang komunista sa layuning hikayatin ang pagbubuo at pagpapalakas ng partido komunista bilang taliba ng mga bagong demokratiko o sosyalistang rebolusyon sa iba't ibang bansa.

Nananatiling pinakamalaking ambag ng Partido sa pandaigdigang kilusang komunista ang pagsusulong ng demokratikong rebolusyong bayan sa Pilipinas. Bawat hakbang pasulong at tagumpay na nakamit ng Partido sa pagsulong ng rebolusyong Pilipino ay suntok sa imperyalismong US, na ambag at inspirasyon sa lahat ng proletaryong pwersa sa lahat ng dako ng mundo.

Gayon na lamang ang determinasyon ng Partido Komunista ng Pilipinas, katuwang ang lahat ng rebolusyonaryong pwersa sa Pilipinas, na ubos-kayang isulong ang demokratikong rebolusyong bayan. Sa harapan ng napakainam na sitwasyon, at sa wastong pamumuno ng Partido, natatanaw ng Komite Sentral na magmamartsa pasulong ang matagalang digmang bayan patungo sa ganap na tagumpay.

Panghawakan at isabuhay ang Marxismo-Leninismo-Maoismo!
Wakasan ang imperyalismo, pyudalismo at burukrata-kapitalismo!
Itanghal ang Pulang bandila ng demokratikong rebolusyong bayan!
Isulong ang matagalang digmang bayan!
Mabuhay ang proletaryo at sambayanang Pilipino!
Mabuhay ang Partido Komunista ng Pilipinas!